

Easaontas i gContae an Chláir

Ceist 1 Beidh tú ag féachaint ar ball ar thuairisc faoin tuairim atá ag daoine i gContae an Chláir faoin úsáid a bhaineann arm Mheiriceá as Aerfort na Sionna. An dtuigeann tú na focail seo a bheidh sa tuairisc?

pobalbhreith	tromlach	eitleáin	ag tuirlingt
breosla	scoiltithe	idir dhá chomhairle	

Ceist 2 Anois féach ar an tuairisc agus freagair na ceistanna thíos.

1. Cé mhéad saighdiúir Meiriceánach a chuaigh tríd Aerfort na Sionna gach bliain le trí bliana anuas?
2. Cé mhéad duine atá in aghaidh tuirlingt arm Mheiriceá ag an aerfort?
3. Cé mhéad duine atá i bhfábhar tuirlingte?
4. Cé mhéad duine atá idir dhá chomhairle?

Ceist 3 Féach ar na habairtí thíos:

Léiríonn an pobalbhreith go bhfuil muintir an Chláir scoiltithe.
Ní aontaíonn tromlach na ndaoine leis an úsáid a bhaineann na saighdiúirí as an aerfort

An féidir leat na habairtí seo a chríochnú? Beidh ort na focail idir lúibíní a athrú.

1. Gach Céadaoin agus Sathairn _____ daoine ticéid don Chrannchur Náisiúnta. (ceannaigh)
2. _____ na páistí an-luath gach maidin. (dúisigh)
3. De ghnáth _____ Seán ar a leathuair tar éis a seacht. (éirigh)
4. Gach tráthnóna _____ Nuacht TG4 ar a seacht a chlog. (tosaigh)
5. _____ Máire an obair bhaile i gcónaí roimh féachaint ar an teilifís. (críochnaigh)

Ceist 4 Féach ar na habairtí thíos:

Tá imní orthu faoi na *postanna* a chaillfí.
Ní aontaíonn tromlach na ndaoine leis an úsáid a bhaineann na *saighdiúirí* as an aerfort

An féidir leat na bearnaí thíos a líonadh?

	<i>uatha</i>	<i>iolra</i>
1	post	postanna
2	saighdiúir	saighdiúirí
3	duine	
4	bláth	
5	dochtúir	
6	baile	
7	cara	
8	bord	
9	aerfort	
10	teach	
11	siopa	
12	fuinneog	
13	bróg	
14	páiste	

Ceist 5 Féach ar na habairtí thíos:

Stopann na heitleáin *ar an mbealach* go dtí an Iaráic.
Scríobh an múinteoir an abairt *ar an gclár dubh*.

Cad a tharlaíonn do 'bealach' agus 'clár dubh' tar éis 'ar an'?

An féidir leat na habairtí seo a chríochnú? Beidh ort na focail idir lúbíní a athrú.

1. Chuir Máire an dinnéar ar an _____. (bord)
2. Bhreathnaigh Colm ar an _____. (pictiúr)
3. Thit Síle ar an _____ agus ghortaigh sí í féin. (bóthar)
4. Bhí dath gorm ar an _____. (bád)
5. Ghlaigh Seán ar an _____ a bhí aige i Londain. (cara)

Ceist 6 Ar cheart d'arm Mheiriceá bheith ag úsáid Aerfort na Sionna? Cad a cheapann tú?

Treoracha agus Freagraí

Ceist 1

Tá an cheist seo le déanamh sula seinntear an tuairisc.

pobalbhreith – *opinion poll*

tromlach - *majority*

eitleáin - *aeroplanes*

ag tuirlingt - *landing*

breosla - *fuel*

scoiltithe - *split*

idir dhá chomhairle - *undecided*

Ceist 2

1. Breis agus 300,000.
2. 48%.
3. 43%.
4. 9%.

Ceist 3

1. ceannaíonn
2. dúisíonn
3. éiríonn
4. tosaíonn
5. críochnaíonn

Ceist 4

1	post	postanna
2	saighdiúir	saighdiúirí
3	duine	daoine
4	bláth	bláthanna
5	dochtúir	dochtúirí
6	baile	bailte
7	cara	cairde
8	bord	boird
9	aerfort	aerfoirt
10	teach	tithe
11	siopa	siopaí
12	fuinneog	fuinneoga
13	bróg	bróga
14	páiste	páistí

Ceist 5

1. ar an mbord
2. ar an bpictiúr
3. ar an mbóthar
4. ar an mbád
5. ar an gcara

Ceist 6

Is féidir gach beirt a chur ag déanamh an phlé seo agus ansin na ceisteanna a phlé leis an rang iomlán.

Eimear Ní Chonaola

Léiríonn pobalbhreith de chuid Nuacht TG4 agus TNS/MRBI go bhfuil an pobal i gContae an Chláir scoiltithe faoin úsáid a bhaineann arm Mheiriceá as Aerfort na Sionna. Ní aontaíonn tromlach na ndaoine leis an leas a bhaineann saighdiúirí na Stáit Aontaithe as an aerfort cé go bhfuil imní orthu faoi na postanna a chaillfí dá gcuirfí deireadh leis an gcleachtas. Tá tuairisc ag Maolra Mac Donnchadha.

Maolra Mac Donnchadha

Chuile lá san aer, de ló is d'óiche, bíonn na heitleáin chogaidh ag tuirlingt is ag éirí. Líontar le breosla iad ar an mbealach go dtí an sléacht san Íaráic agus tugtar deis do na saighdiúirí iad féin a shearradh. Breis agus 300,000 saighdiúir atá gaibhte tríd an aerfort chuile bhliain le trí bliana anuas – cuid den chairdeas agus den chúirtéis idir comhghleacaithe a deir an rialtas agus cleachtas seanbhunaithe a théann siar go dtí an chéad chogadh in aghaidh Saddam Hussein tús na naochaidí agus roimhe sin. Ach tá an pobal áitiúil, muintir an Chláir, scoiltithe faoin ábhar.

Creideann an mhórchuid, 48% díobh, nár chóir arm Mheiriceá a scaoileadh ann níos mó. 43% atá i bhfábhair an chleachtais mar atá, agus 9% den 500 duine a cheistigh TG4 san áit le coicís idir dhá chomhairle. Cuid suntais gur mná agus daoine sna tríochaidí agus lucht baile mór is mó atá in aghaidh na n-eitleán ag tuirlingt. Mar a bheifí ag súil leis, is iad lucht tacaíochta Shinn Féin, Pháirtí an Lucht Oibre agus Chomhaontas Glas is mó atá ag iarraidh cosc a chur ar na heitleáin. Ach díol spéise é an difear i bhFianna Fáil. Tá 60% den dream a sheasann le Brendan Daly ag iarraidh go n-athrófaí an polasaí i leith na Stáit Aontaithe sa tSionnainn. Ach tá tromlach mhuintir Tony Killeen ag iarraidh go leanfaidh cúrsaí mar atá. Tá an pobal seo deighilte mar sin faoi lámh láidir Mheiriceá sa domhan mór.

Ach is cúrsaí níos gaire do bhaile atá i mbarr aigne acu. Dúirt an $\frac{3}{4}$ cuid de mhuintir Chontae an Chláir go mbeadh an áit thíos leis dá ndiúltófaí cuidiú le cogadh Mheiriceá. Chaillfí postanna sa réigiún a dúirt daoine, chaillfí go leor postanna a dúirt an tríú cuid díobh. Ach ina dhiaidh sin féin, tá móramh sa chontae a deir gur chóir cosc a chur ar na heitleáin.

Maolra Mac Donnchadha, Nuacht TG4